

Na osnovu člana 16. stav 3. Zakona o veterinarstvu u Bosni i Hercegovini ("Službeni glasnik BiH", broj 34/02) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na prijedlog Ureda za veterinarstvo Bosne i Hercegovine, na 110. sjednici održanoj 30. decembra 2009. godine, donijelo je

PRAVILNIK

O OZNAČAVANJU I KONTROLI KRETANJA ŽIVOTINJA U BOSNI I HERCEGOVINI

Član 1. (Predmet)

- (1) Pravilnikom o označavanju i kontroli kretanja životinja u Bosni i Hercegovini (u daljnjem tekstu: Pravilnik) utvrđuje se sistem za označavanje i registraciju kretanja goveda, svinja, ovaca i koza u Bosni i Hercegovini.
- (2) Odredbe ovoga Pravilnika primjenjuju se ne dovodeći u pitanje posebne propise donesene radi iskorjenjivanja ili kontrole bolesti životinja, pregleda i kontrola živih životinja u prometu preko granice Bosne i Hercegovine i posebne propise donesene radi ostvarivanja poticaja u poljoprivredi.

Član 2. (Značenje termina)

U ovom Pravilniku korišteni termini imaju slijedeće značenje:

- a) Govedo-označava životinju koja pripada vrsti domaćih goveda, uključujući bivola (*bubalus bubalus*) i bizona (*bison bison*);
- b) Svinja-označava životinju koja pripada porodici Suidae, koja se uzgaja ili drži na farmi;
- c) Ovca-svaka životinja koja pripada potporodici Caprinae rodu *Ovis*;
- d) Koza-svaka životinja koja pripada potporodici Caprinae rodu *Capra*;
- e) Životinja-svako govedo, svinja, ovca i koza;
- f) Farma-svaki objekt ili, u slučaju držanja životinja na otvorenom, svako mjesto smješteno unutar područja Bosne i Hercegovine na kojem životinje povremeno ili trajno borave i/ili se uzgajaju, drže ili se na neki drugi način s njima postupa, osim veterinarske prakse i veterinarske organizacije;
- g) Vlasnik-bilo koje fizičko ili pravno lice koje je odgovorno za životinju, stalno ili privremeno, uključujući i za vrijeme prijevoza ili na tržnici, osim veterinarske prakse i veterinarske organizacije;
- h) Državna baza podataka (u daljnjem tekstu: DBP)-osnovna baza podataka o domaćim životinjama (goveda, konji, svinje, ovce i koze, psi), farmama i vlasnicima u Bosni i Hercegovini iz koje su vidljivi i svi podaci o premještanju životinja koje podliježu registraciji kretanja u skladu s ovim Pravilnikom;
- i) Registar životinja na farmi-propisana evidencija čiji je sadržaj propisan ovim Pravilnikom, a koji se vodi na svakoj farmi, na kojoj se drže goveda, svinje, ovce i koze;
- j) Dokument za kretanje-dokument čiji izgled i sadržaj je propisan ovim Pravilnikom i koji uvijek mora pratiti životinje kada se pokreću s farme (pasoš za goveda i putni list za svinje, ovce i koze);
- k) Središnji nadležni organ-Ured za veterinarstvo Bosne i Hercegovine, upravna organizacija u sastavu Ministarstva vanjske trgovine i ekonomskih odnosa Bosne i Hercegovine, nadležan za provođenje dijela odredbi ovoga Pravilnika, putem Agencije za označavanje životinja (u daljnjem tekstu: Agencija);

- l) Nadležni organ-Ministarstvo poljoprivrede, vodoprivrede i šumarstva Republike Srpske, Federalno ministarstvo poljoprivrede, vodoprivrede i šumarstva i Odjel za poljoprivredu, šumarstvo i vodoprivredu Brčko Distrikta Bosne i Hercegovine, nadležno za implementaciju označavanja putem svog regionalnog ureda za unos podataka (u daljnjem tekstu: regionalni ured);
- m) Službeni veterinar-uposleni u organu uprave koji radi u državnoj upravi na općinskom, kantonalnom ili entitetskom nivou i Brčko Distriktu Bosne i Hercegovine, nadležan za provođenje veterinarskih kontrola na nekom području;
- n) Nadležni organ za inspekcijske poslove-organ uprave nadležan za inspekcijske poslove iz oblasti veterinarstva;
- o) Ovlaštena veterinarska organizacija-veterinarska organizacija, ovlaštena od strane nadležnog organa za provođenje pojedinih odredbi ovog Pravilnika na određenom području.
- p) ovlašteni vlasnik - vlasnik koji je nakon uspješno izvršene obuke, organizirane i provedene od strane Agencije, ovlašten od strane nadležnog organa za samostalno označavanje i registraciju novooznačenih životinja

Član 3. (Elementi sistema)

Sistem označavanja i registracije goveda, ovaca, koza i svinja čine slijedeći elementi:

- a) sredstva za označavanje, kojima se označava svaka pojedina životinja;
- b) ažurirani registar životinja na farmi, koji se vodi na svakoj farmi;
- c) dokument koji prati životinje prilikom kretanja;
- d) elektronska baza podataka s DBP.

Član 4. (Registracija farme i prvo označavanje životinja na farmi)

- (1) Sve farme u Bosni i Hercegovini na kojima se drže domaće životinje (goveda, ovce, koze, svinje, konji i perad) moraju biti uneseni u DBP. U svrhu provedbe odredbi ovog Pravilnika, svakoj farmi unesenoj u DBP će biti dodijeljen jedinstveni registracijski broj. U svim slučajevima u kojima to bude moguće, jedinstvenom registracijskom broju će biti pridružen pripadajući broj iz Registra poljoprivrednih gazdinstava.
- (2) Zahtjev za registraciju farme podnosi vlasnik ovlaštenoj veterinarskoj organizaciji, koja provodi registraciju farme prilikom prvog označavanja životinja na toj farmi.
- (3) Regularno prvo označavanje goveda, svinja, ovaca i koza na novoregistriranim farmama čije porijeklo nije moguće utvrditi putem DBP, može se provoditi zaključno, do 01. januara 2013. godine. Nakon ovog datuma, provođenje prvog označavanja životinja može se provesti jedino uz dopuštenje nadležnog veterinarskog inspektora..
- (4) Registracija farme i podaci o označenim životinjama dostavljaju se putem obrasca za registraciju, koji ovlaštena veterinarska organizacija dostavlja pripadajućem regionalnom uredu koji unosi podatke u DBP.

Član 5. (Označavanje goveda)

- (1) Sva goveda na farmi moraju biti označena propisanom ušnom markicom koja se mora staviti u oba uha. Obje ušne markice nose isti jedinstveni identifikacijski broj po kojem je moguće identificirati svaku pojedinu životinju i povezati je s farmom na kojoj je rođena.

- (2) Goveda se moraju označiti unutar 20 dana od rođenja, a u svakom slučaju prije nego životinja napusti farmu na kojoj je rođena.
- (3) Nijedno govedo ne može biti pokrenuto s farme ako nije označeno u skladu s odredbama ovog člana.
- (4) Obaveze prilikom uvoza goveda:
- a) svako uvezeno govedo, osim u slučaju uvoza iz Hrvatske, Srbije, Crne Gore, Makedonije (u daljnjem tekstu: zemlje regije) i Evropske unije, koje ostaje na području Bosne i Hercegovine mora biti označeno ušnom markicom na odredišnoj farmi (u daljnjem tekstu: karantin), u skladu sa zahtjevima iz ovoga člana, u roku koji ne smije biti duži od 20 dana nakon uvoza, a u svakom slučaju prije napuštanja karantina;
 - b) odredbe iz stava (4) tačka a) ovog člana se ne primjenjuju ako je govedo namijenjeno klanju i ako se zakolje pod veterinarskom kontrolom u roku od 20 dana od uvoza;
 - c) svako govedo uvezeno iz država članica Evropske unije i zemalja regije zadržava svoju izvornu ušnu markicu;
 - d) izvornu identifikaciju koju je provela država koja nije članica Evropske unije ili nije zemlja iz regije (u daljnjem tekstu: treća zemlja) mora se upisati u DBP, propisan članom 9. ovoga Pravilnika i u Registar goveda na imanju iz člana 13. ovog Pravilnika, zajedno s novim jedinstvenim identifikacijskim brojem dodijeljenim u Bosni i Hercegovini.
- (5) Zahtjev za označavanje životinja podnosi vlasnik ovlaštenoj veterinarskoj organizaciji u roku od 14 dana od rođenja teleća ili uvoza životinje iz treće zemlje.

Član 6.
(Označavanje ovaca i koza)

- (1) Sve ovce i koze na farmi, koje su rođene nakon stupanja na snagu ovog Pravilnika, moraju biti označene u roku od šest mjeseci od rođenja, u skladu sa stavom (3) ovoga člana, a u svakom slučaju prije odlaska s farme na kojoj su rođene.
- (2) Izuzetno, za životinje koje se drže u ekstenzivnim uslovima, rok za označavanje iz stava (1) ovog člana je devet mjeseci od rođenja.
- (3) Životinje moraju biti označene ušnom markicom u skladu sa zahtjevima iz Priloga I Poglavlje B.
- (4) Zahtjev za označavanje životinja podnosi vlasnik ovlaštenoj veterinarskoj organizaciji najkasnije sedam dana prije isteka roka iz stava (1) i stava (5) tačka a) ovog člana.
- (5) Postupak sa životinjama u slučaju uvoza iz država koje nisu članice Evropske unije:
- a) sve životinje koje su pregledane u skladu s propisanim odredbama pregleda i kontrola živih životinja u prometu preko granice Bosne i Hercegovine i koje ostaju na području Bosne i Hercegovine označavaju se u skladu sa stavom (3) ovoga člana u karantinu, u roku koji nije duži od 14 dana nakon uvoza, a u svakom slučaju prije odlaska iz karantina;
 - b) originalna oznaka države evidentira se u Registru ovaca i koza na imanju iz člana 13. ovog Pravilnika, zajedno s identifikacijskim brojem životinje koji joj je dodijeljen u Bosni i Hercegovini;
 - c) označavanje životinja propisano tačkom a) ovog stava nije obavezno za životinje namijenjene klanju, ako se životinje prevoze direktno s mjesta granične inspekcije u klaonicu koja se nalazi u Bosni i Hercegovini, ako su obavljeni veterinarski pregledi u skladu s tačkom a) ovoga stava i ako se životinja zakolje u roku od 14 dana nakon obavljenih pregleda.
- (6) Sve životinje porijeklom iz država članica Evropske unije zadržavaju vlastite originalne identifikacijske oznake.

(7) Svaki vlasnik životinja, osim prijevoznika, je obavezan regionalnom uredu dostaviti sljedeće:

- a) podatke koji se evidentiraju u DBP i godišnje dojave iz stava (8) ovog člana, kao i podatke potrebne za uspostavu baze podataka iz člana 9. ovoga Pravilnika;
- b) podatke o premještanju životinja iz člana 12. ovoga Pravilnika;
- c) podatke o svim životinjama koje su uvezene.

Podatke iz tač. a), b) i c) ovoga stava vlasnik je dužan dostaviti u roku od 30 dana kada se radi o podacima o vlasniku ili farmi i u roku od sedam dana za podatke o premještanju životinja.

(8) Svaki vlasnik koji drži ovce i koze mora jedanput godišnje ispuniti godišnju dojavu brojnog stanja ovaca i koza na farmi i dostaviti ih regionalnom uredu, radi unosa u DBP, na način i na propisanom obrascu koji se nalazi u Prilogu VII. Godišnja dojava brojnog stanja ovaca i koza na farmi mora sadržavati podatke o broju životinja na dan 01. decembra tekuće godine, s rokom prijave 15 dana od navedenog dana.

Član 7. (Označavanje svinja)

(1) Sve svinje moraju biti označene na način propisan ovim Pravilnikom prije nego što napuste farmu na kojoj su rođene.

(2) Životinje se moraju označiti što je prije moguće, a u svakom slučaju prije nego što napuste farmu, jedinstvenom ušnom markicom koja omogućava određivanje farme s koje potiču uz mogućnost povezivanja s bilo kojim pratećim dokumentom u kojem je navedena takva markica i listi opisanoj u članu 3. stav (1) tačka a) ovog Pravilnika.

(3) U slučaju uvoza iz država koje nisu članice Evropske unije:

a) sve životinje, koje su pregledane u skladu s propisanim odredbama pregleda i kontrola živih životinja u prometu preko granice Bosne i Hercegovine i koje ostaju na području Bosne i Hercegovine, označavaju se u skladu sa stavom (2) ovog člana u karantinu, u roku koji nije duži od 30 dana nakon uvoza, a u svakom slučaju prije odlaska iz karantina;

b) originalna oznaka države evidentira se u Registru svinja na farmi iz člana 13. ovog Pravilnika, zajedno s identifikacijskim brojem životinje koji joj je dodijeljen u Bosni i Hercegovini;

c) označavanje životinja propisano tačkom a) ovog stava nije obavezno za životinje namijenjene klanju, ako se životinje prevoze direktno s mjesta granične inspekcije, u klaonicu koja se nalazi u Bosni i Hercegovini gdje su obavljeni veterinarski pregledi u skladu s tačkom a) ovog stava, te ako se životinja zakolje u roku od 30 dana nakon obavljenih pregleda.

(4) Zahtjev za označavanje životinja podnosi vlasnik ovlaštenoj veterinarskoj organizaciji u roku od 20 dana od rođenja prasadi ili uvoza životinje iz država koje nisu članice Evropske unije.

BRISAN 79/19 (5) Prilikom upisa u DBP za farme na kojima se drži samo jedna svinja za vlastite potrebe upisuju se ime i prezime vlasnika, JMBG, adresa farme i datum kupovine svinje.

Član 8. (Distribucija sredstava za označavanje i provođenje označavanja)

(1) Ušne markice se dodjeljuju direktno farmi u svim slučajevima kada se radi o ovlaštenim vlasnicima, odnosno putem ovlaštenih veterinarskih organizacija u svim ostalim slučajevima i postavljaju se životinjama na sljedeći način:

a) zahtjev za dostavu ušnih markica ovlaštena veterinarska organizacija ili ovlašteni vlasnik podnosi regionalnom uredu;

- b) regionalni ured, nakon provjere trenutnog statusa broja životinja na farmi i prethodno zaduženih markica odobrava odgovarajući broj ušnih markica i dodjeljuje ih farmi odnosno ovlaštenoj veterinarskoj organizaciji u DBP putem informacijskog sistema;
- c) na osnovu odobrenja regionalnog ureda, Agencija štampa odobreni broj ušnih markica i dostavlja ih ovlaštenom vlasniku odnosno ovlaštenoj veterinarskoj organizaciji putem koje je vlasnik podnio zahtjev;
- d) nakon provođenja procedure iz tač. a) do c) ovog stava, ovlašteni vlasnik dužan je označiti životinje na svojoj farmi u rokovima propisanim ovim Pravilnikom, odnosno na blagovremeni zahtjev vlasnika, ovlaštena veterinarska organizacija provodi označavanje životinja na farmi vlasnika koja nije ovlaštena;
- e) dostavljene ušne markice ovlašteni vlasnik i ovlaštena veterinarska organizacija može koristiti samo za označavanje životinja koje su rođene na farmi za koju su odobrene i kojoj su dodijeljene od strane regionalnog ureda.
- (2) Ovlašteni vlasnici i ovlaštene veterinarske organizacije mogu unaprijed zahtijevati određene količine ušnih markica u skladu s njihovim potrebama za period od najviše jedne godine za goveda i šest mjeseci za ovce, koze i svinje, ukoliko to žele i u skladu s odredbama ovog Pravilnika. Maksimalan broj ušnih markica koje se za farmu mogu naručiti kao jednogodišnja, odnosno polugodišnja potreba, ne može preći maksimalno mogući broj novorođenih životinja u periodu od godinu dana od dana podnošenja zahtjeva, uzimajući u obzir vrstu životinja, te broj i starost ženskih životinja prisutnih na farmi u vrijeme podnošenja zahtjeva.
- (3) Zabranjeno je uklanjanje ili zamjena sredstava za označavanje suprotno odredbama ovog Pravilnika. Ako je sredstvo za označavanje postalo nečitko ili je izgubljeno, životinja se, što je prije moguće, mora označiti zamjenskim sredstvom za označavanje koje nosi isti identifikacijski broj životinje u skladu s ovim Pravilnikom. Uz identifikacijski broj životinje i odvojeno od njega, zamjensko sredstvo za označavanje mora nositi oznaku iskazanu rimskim brojem koja pokazuje koliko je puta sredstvo za označavanje zamijenjeno.
- (4) Zamjenske ušne markice za goveda rođena u državi članici Evropske unije ili zemlji regije moraju nositi najmanje isti identifikacijski kod i skraćeni naziv nadležnog organa.
- (5) Ovlaštena veterinarska organizacija je dužna označiti životinje na imanju u roku od pet dana od podnošenja zahtjeva vlasnika. Postavljanje ušnih markica izvodi se na stručan način, bez nanošenja suviše boli životinji.

Član 9.
(DBP)

- (1) Središnji nadležni organ će uspostaviti i održavati funkcionalnom elektronsku bazu podataka u kojoj će se voditi DBP koji sadrži sve podatke potrebne za uspješno provođenje sistema označavanja i registracije kretanja goveda, svinja, ovaca i koza.
- (2) DBP sadrži najmanje podatke navedene u Prilogu II.
- (3) Sve farme unesene u DBP moraju ostati evidentirane u njemu do proteka najmanje tri godine od dana kada je zadnja životinja s farme napustila farmu.
- (4) Ured za veterinarstvo BiH će svim nadležnim organima koji sudjeluju u provedbi sistema označavanja životinja osigurati pristup DBP i svim podacima koji su propisani ovim Pravilnikom i preduzeti potrebne mjere za osiguravanje pristupa navedenim podacima svim zainteresiranim stranama, uključujući i registrirana udruženja potrošača, uzimajući u obzir odredbe posebnih propisa o zaštiti i tajnosti podataka.
- (5) Danom stupanja Bosne i Hercegovine u Evropsku uniju pristup podacima iz stava (4) ovog člana bit će omogućen i Evropskoj komisiji.

Član 10.
(Dokument za kretanje goveda)

(1) Pasoš za goveda izdaje se u skladu sa slijedećim odredbama:

- a) Agencija će za svako govedo koje se mora označiti u skladu s članom 5. ovog Pravilnika osigurati izdavanje pasoša u roku od 14 dana nakon zaprimanja obavijesti o njenom rođenju ili u slučaju uvoza goveda, osim onih iz Evropske unije i zemalja regije, u roku od 14 dana od zaprimanja obavijesti o njihovom ponovnom označavanju u skladu s članom 5. stav (4) ovoga Pravilnika. Za goveda koja dolaze iz država članica Evropske unije i zemalja regije može se izdati pasoš pod istim uslovima. U takvim slučajevima, vlasnik uvezenih goveda dostavlja pasoš regionalnom uredu koji ga proslijeđuje Agenciji, a koja ga mora vratiti nadležnom organu države članice Europske unije, koja je pasoš izdala;
- b) svaki put kada se govedo premješta mora ga pratiti pasoš;
- c) svaki vlasnik goveda dužan je ispuniti pasoš neposredno po dolasku i prije odlaska svakog goveda s farme i osigurati da pasoš prati govedo tokom cijelog transporta;
- d) u slučaju uginuća goveda, vlasnik mora pasoš dostaviti regionalnom uredu koji pasoš dostavlja Agenciji, u roku od sedam dana nakon uginuća goveda. Ukoliko je govedo otpremljeno u klaonicu, odgovorno lice u klaonici odgovorno je za dostavu pasoša regionalnom uredu koji ga dostavlja Agenciji;
- e) kad se goveda izvoze u države koje nisu članice Evropske unije, pasoš posljednji vlasnik mora predati službenom veterinaru u mjestu gdje se goveda otpremaju;
- f) u skladu s posebnim propisima o poticajima u poljoprivredi, na pasošu se moraju dodati podaci o premijskom statusu za muško govedo (prva i druga starosna kategorija);
- g) pasoš izdaje regionalni ured uz prethodno odobrenje Agencije, putem informacijskog sistema, na način da prije ispisa pasoša u DBP mora unijeti serijski broj obrasca pasoša;
- h) regionalni ured pasoš dostavlja vlasniku putem ovlaštenih veterinarskih organizacija.

(2) Sadržaj pasoša nalazi se Prilogu III, Poglavlje A.

Član 11.

(Dokument za kretanje ovaca, koza i svinja)

- (1) Sve ovce, koze i svinje koje se premještaju unutar Bosne i Hercegovine između dvije odvojene farme mora pratiti Putni list u skladu s propisanim obrascem. Putni list sadrži najmanje podatke propisane Prilogom III Poglavlje B., a ispunjava ga vlasnik.
- (2) Vlasnik na farmi odredišta mora čuvati Putni list najmanje tri godine. Na zahtjev službenog veterinara vlasnik mora dostaviti kopiju Putnog lista.

Član 12.

(Prijava kretanja životinja)

- (1) Svaki vlasnik životinja je obavezan prijaviti svako premještanje na farmi i s farme, svako rođenje i uginuće životinje na farmi uključujući tačne datume svih promjena, u roku od sedam dana od njihovog nastanka. Vlasnik može zahtijevati produženje ovog roka, koji službeni veterinar može produžiti, o čemu obavještava Agenciju putem regionalnog ureda, a primjenjuje se u slučaju premještanja goveda na ljetnu ispašu na sezonski/zajednički pašnjak.
- (2) Svi vlasnici životinja prijavu kretanja mogu izvršiti direktno u DBP putem informacijskog sistema ili u slučaju stočnih pijaca i klaonica dostavljanjem odgovarajućih obrazaca direktno regionalnom uredu radi unosa u DBP, odnosno u slučaju svih drugih vlasnika dostavljanjem odgovarajućih obrazaca regionalnom uredu radi unosa u DBP putem ovlaštenih veterinarskih organizacija.
- (3) U slučaju uvoza životinja, granični veterinarski inspektor je obavezan, putem informacijskog sistema, unijeti u DBP najavu kretanja, koja sadrži informacije o državi porijekla, vrsti, kategoriji, broju i namjeni

životinja, te farmu prvog odredišta, dok je vlasnik karantina, odnosno klaonice, obavezan izvršiti prijavu kretanja u skladu s odredbama ovog Pravilnika.

(4) Za prijavu kretanja goveda koriste se posebni obrasci, dok se za prijavu kretanja ovaca, koza i svinja može koristiti odgovarajući primjerak putnog lista.

Član 13.

(Registar životinja na farmi)

(1) Uz izuzetak prijevoznika, svaki vlasnik životinja mora voditi ažuriran Upisnik životinja na farmi u koji je upisan tačan broj životinja na farmi i najmanje podaci navedeni u Prilogu IV.

(2) Svaki vlasnik je, na zahtjev službenog veterinara, dužan dostaviti sve podatke koji se odnose na porijeklo i označavanje i ako je moguće, odredište životinja koje je vlasnik držao, čuvao, prevezio, stavio u promet ili zaklao u posljednje tri godine.

(3) Registar životinja na farmi mora biti u propisanom obliku, mora se voditi ili ručno ili elektronski i mora biti dostupan u svakom trenutku na zahtjev službenog veterinara, te se mora čuvati najmanje tri godine od unosa zadnjeg zapisa.

(4) Vođenje registra životinja na farmi obaveza je vlasnika i odgovornog lica kada je vlasnik pravno lice.

(5) Registar životinja na farmi vlasnik mora držati na lokaciji gdje se životinje nalaze i uvijek mora biti dostupan u slučaju obavljanja kontrole od strane službenog veterinara.

(6) Izgled i sadržaj Registra životinja na farmi navedeni su u Prilogu IV.

Član 14.

(Provođenje kontrole)

(1) Nadležni organ za inspekcijske poslove provodi redovne kontrole poštivanja odredbi ovog Pravilnika s ciljem osiguranja usklađenosti postupaka svih sudionika sistema označavanja i registracije kretanja životinja u Bosni i Hercegovini s odredbama ovoga Pravilnika.

(2) U slučaju postupanja suprotno odredbama ovoga Pravilnika službeni veterinari su dužni izreći mjere prema prekršiteljima, u skladu s načinjenim prekršajem i pozitivnim zakonskim propisima.

Član 15.

(Opći kriteriji kontrole)

(1) Kontrole propisane u članu 14. stav (1) moraju udovoljavati minimalnim općim zahtjevima određenim ovim članom.

(2) Službeni veterinar na licu mjesta provodi kontrole radi utvrđivanja postupanja vlasnika u skladu s odredbama ovoga Pravilnika, u pravilu bez najave.

(3) Ako je neophodno, službena kontrola se prethodno može najaviti, u opravdanim i ograničenim slučajevima, a najava se obavlja u periodu ne dužem od 48 sati prije kontrole, osim u izuzetnim slučajevima.

(4) Radi postizanja veće racionalnosti, kontrole se mogu provoditi u sklopu kontrola koje se na farmi provode na osnovu drugih propisa.

(5) Odabir farmi koje su predmet kontrole provodi se na osnovu analize rizika, koja za svaku farmu uzima posebno u obzir slijedeće:

a) broj životinja na farmi, uključujući detalje o svim životinjama koje se nalaze na farmi i o životinjama koje su označene na farmi;

b) aspekte javnoga zdravstva i zdravlja životinja, a naročito prethodne slučajeve izbijanja bolesti;

- c) iznos godišnjih poticaja za životinje koji je zatražen i/ili isplaćen farmi, u poređenju s iznosom koji je isplaćen za prethodnu godinu;
- d) značajne promjene u odnosu na stanje prethodnih godina;
- e) rezultate kontrola provedenih u ranijim godinama, naročito:
 - 1) pravilno vođenje Registra životinja na farmi, kako je propisano ovim Pravilnikom;
 - 2) pravilno čuvanje dokumenata za kretanje za životinje koje se nalaze na farmi, kako je propisano ovim Pravilnikom;
 - 3) pravilno dostavljanje podataka svim nadležnim tijelima;
- f) ostale propisane kriterije.

Član 16.
(Kontrola farmi goveda)

- (1) Pored općih zahtjeva navedenih u članu 14. ovog Pravilnika, prilikom provođenja kontrola na farmama gdje se drže goveda, službeni veterinari su dužni pridržavati se i dodatnih kriterija određenih ovim članom.
- (2) Službenu kontrolu svake godine mora obuhvatiti minimalno 10% od ukupnog broja farmi na kojima se drže goveda, koja se nalaze na području njihove nadležnosti.
- (3) Minimalni nivo kontrola obavezno se povećava u slijedećem godišnjem periodu kontrole, ako se utvrdi neusklađenost s odredbama ovog Pravilnika.
- (4) Kontrola obuhvaća sva goveda na farmi za koje je propisano označavanje u skladu s odredbama ovoga Pravilnika.
- (5) Izuzetno od stava (4) ovog člana, ako iz praktičnih razloga nije moguće u roku od 48 sati okupiti sve životinje na farmi, službeni veterinar može odrediti sistem uzorkovanja pod uslovom da je osiguran pouzdan stepen kontrole.

Član 17.
(Kontrola farmi ovaca i koza)

- (1) Pored općih zahtjeva navedenih u članu 14. ovog Pravilnika, prilikom provođenja kontrola na farmama gdje se drže ovce i koze, službeni veterinari su dužni pridržavati se i dodatnih kriterija određenih ovim članom.
- (2) Službena kontrola svake godine mora obuhvatiti najmanje 3% od ukupnog broja farmi na kojima se drže ovce i koze, na kojima boravi najmanje 5% životinja, koje se nalaze na području njihove nadležnosti.
- (3) Minimalni nivo kontrola obavezno se povećava u slijedećem godišnjem periodu kontrole, ako se utvrdi neusklađenost s odredbama ovog Pravilnika.
- (4) Kontrola obuhvaća sve ovce i koze na farmi za koje je propisano označavanje u skladu s odredbama ovoga Pravilnika.
- (5) Ukoliko se na farmi nalazi više od 20 životinja, kontrola identifikacije životinja može se provoditi na reprezentativnom uzorku ovaca i koza koji omogućava otkrivanje 5% životinja koje nisu označene u skladu s odredbama ovog Pravilnika, s 95%-tnom sigurnošću.
- (6) Ako se kontrolama provedenima na reprezentativnom uzorku u skladu sa stavom (5) ovog člana utvrdi neusklađenost sa zahtjevima za označavanje i registraciju ovaca i koza propisanim ovim Pravilnikom, sve ovce i koze na farmi moraju biti obuhvaćene kontrolom.

Član 18.

(Izvještaj o provedenoj kontroli)

- (1) Nakon svake provedene kontrole podnosi se standardizirani izvještaj iz Priloga V, u kojem se utvrđuju rezultati kontrole i svi nepovoljni nalazi, razlog za kontrolu i prisutna lica. Vlasnik ili njegov predstavnik potpisuju izvještaj i mogu dati primjedbe na njegov sadržaj.
- (2) Ako se utvrdi postupanje suprotno odredbama ovog Pravilnika, kopije izvještaja iz stava (5) ovoga člana, bez odgađanja, se dostavljaju Agenciji i nadležnim organima koji su odgovorni za primjenu odredbi posebnih propisa donesenih radi ostvarivanja državnih poticaja u poljoprivredi.

Član 19.

(Mjere u slučaju neusklađenosti)

- (1) U svim slučajevima kada službeni veterinar prilikom provođenja kontrola navedenih u članu 12. ovog Pravilnika utvrdi da su jedna ili više životinja u potpunom neskladu s odredbama ovog Pravilnika koje se odnose na identifikaciju i registraciju životinja, obavezan je zabraniti kretanje svih životinja sa i na tu farmu.
- (2) Ako vlasnik životinja kod kojih su utvrđene neusklađenosti iz stava (1) ovog člana ne dokaže njihovu identifikaciju i porijeklo u roku od dva radna dana, službeni veterinar je dužan narediti njihovo uništavanje i neškodljivo uklanjanje, bez prava na nadoknadu štete za ubijene životinje od strane nadležnih organa.
- (3) U slučajevima kada službeni veterinar prilikom provođenja kontrola navedenih u članu 12. ovog Pravilnika utvrdi da su jedna ili više životinja djelimično u neskladu s odredbama ovog Pravilnika koje se odnose na identifikaciju i registraciju životinja, obavezan je zabraniti kretanje samo tih životinja s farme.
- (4) Ako u slučajevima opisanim u stavu (3) ovog člana broj životinja koje su djelimično u neskladu s odredbama ovog Pravilnika koje se odnose na identifikaciju i registraciju životinja, prelazi 20% ukupnog broja životinja na farmi, ili više od dvije životinje na farmama sa 10 ili manje životinja, službeni veterinar je dužan zabraniti kretanje svih životinja sa i na tu farmu.
- (5) U svim slučajevima kada vlasnik ne prijavi nadležnom organu kretanje životinja u propisanom roku, službeni veterinar je dužan ograničiti kretanje životinja sa i na tu farmu.
- (6) Ukoliko vlasnik ne ispuni obavezu iz člana 20. ovoga Pravilnika, Agencija je ovlaštena odbiti izdavanje Dokumenta za kretanje.
- (7) U slučaju višekratnog ponavljanja neusklađenosti u vezi odredbi iz člana 20. ovog Pravilnika, službeni veterinar može, na prijedlog Agencije, ograničiti kretanje životinja na i sa farme tog vlasnika, dok se svi utvrđeni nedostaci ne otklone.

Član 20.

(Obaveze vlasnika u vezi s troškovima)

Ako ovim Pravilnikom nije drugačije određeno, vlasnik je obavezan platiti sve troškove koji nastanu ispunjavanjem svojih obaveza u provedbi sistema označavanja i registracije životinja iz člana 3. ovoga Pravilnika, koji su povezani s njegovom farmom i životinjama koje na njemu borave.

Član 21.

(Obuka i informiranje)

Središnji nadležni organ, u saradnji s nadležnim organima, osigurava da su sva lica uključena u sistem označavanja i registracije životinja upoznata s odredbama propisa o označavanju i registraciji životinja provođenjem odgovarajućeg osposobljavanja i informiranja.

Član 22.

(Izvještavanje)

(1) Središnji nadležni organ obavještava države članice Evropske unije i Evropsku komisiju o nadležnom organu za provođenje sistema označavanja životinja u Bosni i Hercegovini, izgledu sredstava za označavanje životinja, obliku i sadržaju dokumenata za kretanje životinja i obliku i sadržaju registara životinja na farmi koji se koriste na području Bosne i Hercegovine.

(2) Središnji nadležni organ dostavlja Evropskoj komisiji godišnji izvještaj u kojem detaljno navodi slijedeće:

- a) broj farmi u Bosni i Hercegovini;
- b) broj kontrola provedenih u skladu s članom 14. ovoga Pravilnika;
- c) ukupan broj registriranih životinja na početku godišnjeg perioda kontrole;
- d) broj životinja koje su obuhvaćene kontrolom;
- e) utvrđene neusklađenosti;
- f) izrečene mjere u skladu s članom 14. stav (2) ovoga Pravilnika.

(3) Podaci iz stava (2) ovoga člana, koji se odnose na goveda, dostavljaju se Evropskoj komisiji na obrascu koji sadrži odredbe iz Priloga VI Poglavlja A., najkasnije do 30. juna svake godine.

(4) Podaci iz stava (2) ovoga člana, koji se odnose na ovce i koze, dostavljaju se Evropskoj komisiji u skladu s obrascem iz Priloga VI Poglavlja B., najkasnije do 31. avgusta svake godine.

Član 23.
(Prilozi)

Prilozi od I - VII sastavni su dio ovog Pravilnika.

Član 24.
(Prijelazne odredbe)

(1) U roku od 30 dana od objave ovog Pravilnika nadležni organi su obavezni dostaviti Agenciji listu ovlaštenih veterinarskih organizacija i područja za koja su ovlaštena da provode poslove u skladu s ovim Pravilnikom.

(2) U roku od 30 dana od objave ovog Pravilnika, nadležni inspekcijski organi su obavezni dostaviti Agenciji popis službenih veterinarata i područja za koja su mjesno nadležni.

(3) Sve ovce, koze i svinje na području Federacije Bosne i Hercegovine, koje su označene ušnim markicama na osnovu Pravilnika o obaveznom označavanju i upisu u jedinstveni registar ovaca, koza i svinja te vođenju evidencija ("Službene novine Federacije BiH", broj 87/07) prije stupanja na snagu ovog Pravilnika, zadržavaju postavljene markice do kraja svog života i neće morati biti ponovo označavane u skladu s odredbama člana 6. st. (1) do (3) i odredbama člana 7. st. (1) i (2) ovog Pravilnika, osim u slučaju gubitka originalne ušne markice.

(4) Do stupanja na snagu ovog Pravilnika, Agencija je obavezna preuzeti od Federalnog agromediterranskog zavoda Mostar, koji vodi osnovnu bazu podataka o domaćim životinjama u Federaciji BiH u elektronskom obliku, sve podatke koje se odnose na registracije farmi, označavanje ovaca, koza i svinja i registraciju njihovog kretanja, u svrhu njihovog prebacivanja u DBP i korištenja nakon stupanja na snagu ovog Pravilnika.

(5) Do stupanja na snagu ovog Pravilnika, Agencija je obavezna izraditi modele svih obrazaca koji su propisani ovim Pravilnikom i pripremiti klasifikacije i kodifikacije neophodne za uspostavu funkcionalnog informacijskog sistema.

Član 25.
(Prestanak važenja)

Danom stupanja na snagu ovog Pravilnika prestaje važiti Pravilnik o označavanju životinja i shemi kontrole kretanja životinja u Bosni i Hercegovini ("Službeni glasnik BiH", broj 28/03).

Član 26.
(Stupanje na snagu)

- (1) Ovaj Pravilnik stupa na snagu 01. januara 2013. godine i objavljuje se u "Službenom glasniku BiH".
- (2) Izuzetno od odredbe stava (1) ovog člana, odredbe člana 24. ovog Pravilnika stupaju na snagu osmog dana od dana objave u "Službenom glasniku BiH".
- (3) Izuzetno od odredbi st. (1) i (2) ovog člana, odredbe čl. 4. i 5. ovog Pravilnika stupaju na snagu 01. januara 2011. godine.

VM broj 341/09
30. decembra 2009. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.

Prilog I

Poglavlje A. Sredstva za označavanje goveda

(1) Ušna markica mora sadržavati skraćeni naziv, kod ili logotip nadležnog organa koji je izdao ušnu markicu i znakove određene stavom (2) ovog Priloga.

(2) Znakovi koji tvore jedinstveni broj životinje na ušnoj markici sastoje se od slijedećeg:

a) prva dva znaka označavaju državu u kojoj je životinja prvi put označena, u ovu svrhu koristi se dvoslovna oznaka države, a u slučaju Bosne i Hercegovine oznaka je BA;

b) Znakovi, koji slijede nakon dvoslovne oznake države, su jedan broj koji označava entitet i Brčko Distrikt Bosne i Hercegovine, zatim sedam brojeva koji označavaju progresivni broj životinje i jedan kontrolni broj proračunat pomoću modulo 10 algoritma s težinskim faktorom 3.

(3) Uz određeno st. (1) i (2) ovog člana, ušna markica sadrži i 2/5 naizmjenični barkod koji predstavlja 15 brojeva ISO identifikacijskog broja životinje koje prati jedan broj koji označava medij na kojem se barkod nalazi, gdje broj "1" označava ušnu markicu, a broj "2" pasoš za životinje.

(4) Ušne markice moraju ispunjavati slijedeće zahtjeve:

- a) biti izrađene od savitljivog plastičnog materijala;
- b) biti zaštićene od zloupotrebe i lako čitljive tokom čitavog životnog vijeka životinje;
- c) biti izrađene na način da se ne mogu ponovo koristiti;
- d) biti izrađene na način da ostaju pričvršćene na životinji bez štetnih uticaja na nju;
- e) natpis na njima određen u st. (1), (2) i (3) ovog Priloga mora biti neizbrisiv.

(5) Model ušne markice mora biti u skladu sa slijedećim zahtjevima:

- a) sastojati se od dva dijela žute boje, muškog i ženskog dijela;
- b) svaki od dva dijela mora sadržavati podatke propisane st. (1), (2) i (3) ovog Priloga;
- c) dužina svakog dijela mora biti najmanje 45 mm;
- d) širina svakog dijela mora biti najmanje 55 mm;
- e) visina znakova mora biti najmanje 5 mm.

Odjeljak B. Sredstva za označavanje ovaca i koza

(1) Ušna markica, kojom se označavaju ovce i koze, mora se staviti na životinju na način da je dobro vidljiva iz daljine.

(2) Ušna markica mora sadržavati slijedeće oznake:

a) prva oznaka označava državu u kojoj se nalazi farma na kojem je životinja rođena, a u slučaju Bosne i Hercegovine oznaka je BA;

b) nakon dvoslovne oznake države, slijedi jedan broj koji označava entitet i Brčko Distrikt Bosne i Hercegovine, zatim osam brojeva koji označavaju progresivni broj životinje i jedan kontrolni broj proračunat pomoću modulo 10 algoritma s težinskim faktorom 3. Osam brojeva koji čine progresivni broj životinje sadrže početni broj "1" i on ne može biti veći od broja "7" u slučaju ovaca, a u slučaju koza progresivni broj počinje sa brojem "8".

(3) Ušna markica se stavlja na jedno uho, izrađena je od nerazgradivog materijala, nesalomljiva i lako čitljiva tokom cijelog životnog vijeka životinje žute boje za ovce i svijetlo plave za koze, te oblikovana na način da ostane pričvršćena za životinju, a da je ne ozlijedi. Ušna markica ne može se ponovo koristiti, a natpis na njoj mora biti neizbrisiv.

Poglavlje C. Sredstva za označavanje svinja

(1) Ušna markica kojom se označavaju svinje:

a) sadrži oznaku Bosne i Hercegovine, dva slova BA;

b) nakon dvoslovne oznake države, slijedi jedan broj koji označava entitet i Brčko Distrikt Bosne i Hercegovine, zatim osam brojeva koji označavaju progresivni broj životinje i jedan kontrolni broj proračunat pomoću modulo 10 algoritma s težinskim faktorom 3.

(2) Ušna markica se stavlja na jedno uho, izrađena je od nerazgradivog materijala, nesalomljiva i lako čitljiva tokom cijelog životnog vijeka životinje te oblikovana na način da ostane pričvršćena za životinju, a da je ne ozlijedi. Ušna markica ne može se ponovo koristiti, a natpis na njoj mora biti neizbrisiv.

Prilog II

Poglavlje A. Sadržaj DBP-a za goveda

(1) Za svrhu registracije i kontrole kretanja goveda elektronska baza podataka mora sadržavati najmanje slijedeće informacije:

a) Za svaku životinju:

- 1) identifikacijski broj;
- 2) datum rođenja;
- 3) spol;
- 4) pasminu ili boju dlačnog prekrivača;
- 5) identifikacijski broj majke, ili u slučaju životinje uvezene iz treće zemlje ID broj dodijeljen nakon uvoza koji se može dovesti u vezu s originalnim ID brojem;
- 6) identifikacijski broj farme na kojoj je rođena;
- 7) ID brojevi svih farmi na kojima je životinja bila držana s datumima svake promjene farme;
- 8) datum smrti ili klanja.

b) Za svaku farmu:

- 1) ID broj koji se sastoji ne više od 12 znakova (ne uzimajući u obzir kod države);
- 2) ime i prezime, adresu i JMBG držatelja;
- 3) ako je primjenjivo, ID broj farme pod kojim se vodi u registru poljoprivrednih gazdinstava u svrhu ostvarivanja prava na poticaje.

c) Baza podataka mora moći osigurati slijedeće funkcionalnosti u svako doba:

- 1) ID broj svih goveda prisutnih na farmi;
 - 2) listu svih promjena farmi za svaku životinju vrste goveda s početkom od farme na kojoj je rođena ili farme na koju je uvezena u slučaju životinja uvezenih iz trećih zemalja.
- (2) Ove informacije se moraju čuvati u bazi podataka sve dok najmanje tri uzastopne godine ne prođu od smrti goveda.

Poglavlje B. Sadržaj DBP-a za ovce i koze

Za svrhu registracije i kontrole kretanja ovaca i koza elektronska baza podataka mora sadržavati najmanje slijedeće informacije:

a) Za svaku farmu (osim u slučaju prijevoznika):

- 1) identifikacijski broj farme;
- 2) adresu farme i geografske koordinate ili odgovarajuće pokazatelje geografskog položaja farme;
- 3) ime i prezime, adresu, JMBG te zanimanje vlasnika;
- 4) ako je primjenjivo, ID broj farme pod kojom se vodi u registru poljoprivrednih gazdinstava u svrhu ostvarivanja prava na poticaje;
- 5) vrste životinja;
- 6) vrstu proizvodnje;
- 7) rezultat godišnje dojave iz člana 6. stav (8) ovoga Pravilnika i datum kada je izrađena;
- 8) rubriku za podatke, koju ispunjavaju nadležni organi, a u rubriku se mogu evidentirati podaci o ograničenju kretanja, statusu ili drugi bitni podaci.

b) U skladu s članom 6. ovoga Pravilnika mora postojati posebno mjesto za evidenciju svih premještanja životinja. Evidencija mora sadržavati barem slijedeće podatke:

- 1) broj životinja koje se premještaju;
- 2) identifikacijski broj farme otpreme;
- 3) datum odlaska;
- 4) identifikacijski broj farme odredišta;
- 5) datum dolaska.

Poglavlje C. Sadržaj DBP-a za svinje

(1) Za svrhu registracije i kontrole kretanja svinja elektronska baza podataka mora sadržavati najmanje slijedeće informacije:

a) Za svaku farmu:

- 1) ID broj koji se sastoji ne više od 12 znakova (ne uzimajući u obzir kod države);
- 2) ime i prezime, adresu i JMBG vlasnika;
- 3) ako je primjenjivo, ID broj farme pod kojim se vodi u registru poljoprivrednih gazdinstava u svrhu ostvarivanja prava na poticaje;

b) Baza podataka mora moći osigurati slijedeće funkcionalnosti u svako doba za svako pojedinačno kretanje svinja. Zapis se treba sastojati od najmanje slijedećih informacija:

- 1) broj svinja koje se pokreću;
- 2) identifikacijski broj farme odakle kreću;
- 3) identifikacijski broj farme u koje dolaze;
- 4) datume polaska i dolaska;
- 5) u slučaju grupa svinja, registracijski broj farme porijekla ili stada porijekla i broj zdravstvenog certifikata gdje je to primjenjivo;
- 6) za grupe svinja, registracijski broj posljednje farme, a za uvezene životinje iz trećih zemalja, farmu na koju su uvezene.

(2) Ove informacije će biti čuvane u bazi podataka sve dok najmanje tri uzastopne godine ne prođu od upisa u bazu.

Prilog III

Poglavlje A. Sadržaj dokumenta za kretanje goveda

Pasoš mora sadržavati najmanje slijedeće:

- a) Za svaku životinju:
 - 1) identifikacijski broj;
 - 2) datum rođenja;
 - 3) spol;
 - 4) pasminu ili boju dlačnog prekrivača;
 - 5) identifikacijski broj majke;
 - 6) identifikacijski broj farme na kojoj je rođena;
 - 7) ID brojevi svih farmi na kojima je životinja bila držana s datumima svake promjene farme;
 - 8) datum smrti ili klanja.
- b) Za svaka farma:
 - 1) ID broj koji se sastoji ne više od 12 znakova (ne uzimajući u obzir kod države);
 - 2) ime i adresu držatelja;
- c) potpis svih vlasnika, osim prijevoznika;
- d) naziv tijela, koje izdaje pasoš;
- e) datum izdavanja pasoša.

Poglavlje B. Sadržaj dokumenta za kretanje ovaca, koza i svinja

U Putni list vlasnik mora upisati slijedeće podatke:

- a) identifikacijski broj farme;
- b) ime i prezime, adresu i JMBG vlasnika;
- c) ukupni broj životinja koje se premještaju;
- d) identifikacijski broj farme odredišta ili slijedećeg vlasnika životinja, ili, ako se životinje voze u klaonicu, registarski broj klaonice ili naziv i adresu klaonice, ili u slučaju premještanja stada, mjesto odredišta;
- e) podatke o prijevoznim sredstvima i prijevozniku, uključujući i broj odobrenja prijevoznika ako postoji;
- f) datum odlaska;
- g) potpis vlasnika;
- h) identifikacijski broj za svaku životinju.

Prilog IV

Poglavlje A. Sadržaj registra životinja na farmi za goveda

U Registar goveda na farmi moraju se upisati slijedeći podaci:

- a) ažurirani podaci za svaku životinju:
 - 1) identifikacijski broj;
 - 2) datum rođenja;
 - 3) spol;
 - 4) pasminu ili boju dlačnog prekrivača;
- b) datum uginuća životinje na farmi;

- c) u slučaju odlaska životinje s farme, naziv i adresu vlasnika, s izuzetkom prijevoznika, ili identifikacijsku oznaku farme kojem je/na koje je životinja premještena, kao i datum odlaska;
- d) u slučaju dolaska životinja na farmu, naziv i adresu vlasnika, s izuzetkom prijevoznika, ili identifikacijsku oznaku farme od koje je/s koje je životinja premještena te datum dolaska;
- e) ime i potpis službenog veterinara koji nadzire registar te datum kada je kontrola obavljena.

Poglavlje B. Sadržaj registra životinja na farmi za ovce i koze

U Registar ovaca i koza na farmi se moraju upisati slijedeći podaci:

- a) identifikacijski broj farme;
- b) adresu farme i geografske koordinate ili odgovarajuće pokazatelje geografskog položaja farme;
- c) vrstu proizvodnje;
- d) rezultate posljednje godišnje dojava iz člana 8. ovoga Pravilnika i datum kada je izrađena;
- e) ime i adresu vlasnika;
- f) ako životinje odlaze s farme, ime prijevoznika, registracijsku oznaku dijela prijevoznog sredstva koje prevozi životinje, identifikacijski broj ili naziv i adresu farme odredišta, ili ako se životinje otpremaju u klaonicu, registarski broj klaonice ili naziv klaonice i datum otpreme te ovjerenu kopiju Putnog lista iz člana 7. ovoga Pravilnika;
- g) ako životinje dolaze na farmu, identifikacijski broj farme s koje je životinja dopremljena i datum dolaska;
- h) podatke o svim zamjenama ušnih markica ili elektronskih uređaja;
- i) identifikacijski broj životinje;
- j) godinu rođenja i datum označavanja;
- k) mjesec i godinu uginuća životinje na farmi;
- l) pasminu i genotip, ako je poznat;
- m) ime i potpis službenog veterinara koji je provjerio Registar ovaca i koza na farmi i datum kada je obavljena kontrola.

Poglavlje C. Sadržaj registra životinja na farmi za svinje

(1) Osnovni podaci:

- a) identifikacijski broj farme;
- b) adresa farme;
- c) ime i prezime odnosno naziv vlasnika, adresu/sjedište vlasnika ako je drugačije od adrese farme;
- d) JMBG/MB za fizičko/pravno lice;
- e) ukupan broj svinja na farmi, nakon svake promjene;
- f) o ponovnom označavanju svinja;
- g) o uginućima;
- h) evidencija o liječenju i karenci;
- i) o klanju svinja za vlastite potrebe;
- j) bilješka o kontroli farme od strane službenog veterinara (ime i potpis te datum kontrole).

(2) Pri ponovnom označavanju životinja upisuju se slijedeći podaci:

- a) prethodni identifikacijski broj farme;
 - b) novi identifikacijski broj farme;
 - c) broj ponovno označenih svinja;
 - d) datum ponovnog označavanja.
- (3) Pri dopremi svinja na farmu s druge farme upisuju se slijedeći podaci:
- a) identifikacijski broj farme s koje se svinje otpremaju;
 - b) datum dopreme svinja;
 - c) ušna markica ili tetovirni broj (oznake) na dopremljenim svinjama, a ako je grupa dopremljenih svinja označena različitim oznakama mora se navesti broj svinja označenih istim oznakama te ukupan broj dopremljenih svinja.
- (4) Pri otpremi svinja na novu farmu ili na klaonicu upisuju se slijedeći podaci:
- a) datum otpreme svinja;
 - b) ukupan broj otpremljenih svinja te oznake svinja, a ako je grupa svinja označena različitim oznakama mora se navesti broj svinja za svaku oznaku;
 - c) podaci o odredišnoj farmi ili klaonici (ime/naziv, adresa i identifikacijski broj farme /broj klaonice);
 - d) serijski broj putnog lista;
- e) u slučaju prodaje/otpreme jedne svinje na farmu, koja jednu svinju drži za vlastite potrebe u skladu s članom 7. ovoga Pravilnika, ime i prezime, JMBG i adresu vlasnika.
- (5) Za uvezene svinje mora se upisati:
- a) država izvoznica;
 - b) identifikacijski broj/šifra farme otpreme svinja;
 - c) identifikacijske brojeve dopremljenih svinja;
 - d) datum uvoza.
- (6) Za izvezene svinje, osim podataka iz stava (4) ovoga Poglavlja, mora se navesti i zemlja odredišta.

Prilog V

Sadržaj standardiziranog izvještaja službenog veterinara

Nakon svake kontrole podnosi se standardizirani izvještaj, koji sadrži najmanje slijedeće:

- a) razlog za odabir farme za provođenje kontrole;
- b) podatke o licima prisutnima tokom kontrole;
- c) rezultate kontrole i sva postupanja suprotna odredbama ovog Pravilnika.

Prilog VI

Poglavlje A. Sadržaj obrasca za podnošenje godišnjeg izvještaja Evropskoj komisiji za goveda

(1) Informacije vezane za rezultate u skladu s odredbama člana 22. stav (2) tač. a) do d):

- a) ukupan broj farmi na području Bosne i Hercegovine registriranih na početku perioda izvještavanja/kontrole;
- b) ukupan broj gazdinstava na kojima je provedena kontrola;
- c) ukupan broj provedenih kontrola;
- d) kriteriji provedene analize rizika za odabir farmi na kojima je provedena kontrola, s referencom na organ koji je proveo kontrolu i presjek odabranih farmi na osnovu kriterija analize rizika;
- e) ukupan broj goveda koji je registriran na početku perioda izvještavanja/kontrole;
- f) ukupan broj goveda na farmama na kojima je provedena kontrola;
- g) vrsta urađene provjere, npr. fizički pregled, pregled dokumentacije, pregled kašnjenja prilikom prijave kretanja.

(2) Informacije vezane za rezultate u skladu s odredbama člana 22. stav (2) tač. e) i f):

- a) broj utvrđenih prekršaja, s osvrtom na tipove nedostataka utvrđenih različitim načinima pregleda, u skladu s odredbama tačke g) stav (1) ovog Poglavlja;
- b) sankcije (uključujući vrste kazni i informacije o statusu) navedene u skladu s tipom provjere koja je provedena i utvrđenoj neusklađenosti, u skladu s odredbama tačke g) stav (1) i tačke a) stav (2) ovog Poglavlja.

Poglavlje B. Sadržaj obrasca za podnošenje godišnjeg izvještaja Evropskoj komisiji za ovce i koze

- (1) Osnovne informacije o farmama, životinjama i provjerama:

Ukupan broj registriranih gazdinstava na području Bosne i Hercegovine na početku godišnjeg perioda kontrole	
Ukupan broj gazdinstava na kojima su provedene kontrole	
Ukupan broj kontrola	
Ukupan broj registriranih ovaca i koza u Bosni i Hercegovini na početku godišnjeg perioda kontrole	
Ukupan broj ovaca i koza na farmama na kojima su provedene kontrole	

- (2) Utvrđene neusklađenosti po kategorijama:

	Broj životinja	Broj farmi
a) Nepravilnosti u označavanju ovaca		
b) Nepravilnosti u označavanju koza		
c) Nepravilnosti u Registru ovaca i koza na farmi		
d) Izostanak prijave premještanja		
e) Nepravilnosti u odnosu na Putni list		
f) Životinje/farme sa samo jednim nepropisnim postupanjem navedenim u tač. a) do e)		
g) Životinje/farme s više od jednog nepropisnog postupanja navedenog u tač. a) do e)		
h) Ukupan broj nepropisnih postupanja po životinji/farmi iz tač. f) i g)		

- (3) Izrečene sankcije:

	Broj neusklađenih životinja	Broj neusklađenih farmi
Ukupno		

Prilog VII

- (1) Prilikom godišnje dojava brojnog stanja ovaca i koza na farmi broj životinja mora biti razvrstan po kategorijama i to:

- a) ovce:

- 1) mliječne ovce i šilježice za rasplod;
- 2) ostale ovce i šilježice za rasplod;
- 3) ovnovi;
- 4) janjad do šest mjeseci;
- 5) druge ovce;
- 6) ukupno.

- b) koze:

- 1) ožarene koze;
- 2) koze koje su pripuštene po prvi put;
- 3) ostale koze;
- 4) jarčevi;
- 5) jarad do šest mjeseci;
- 6) ukupno.

(2) Vlasnik životinja podatke iz stava (1) ovoga Priloga dostavlja regionalnom uredu, putem ovlaštenih veterinarskih organizacija, koji dobijene podatke upisuje u DBP u roku od 15 dana od njihovog primitka.